

欽定剿平粵匪方略

欽定剿平粵匪方略卷一百七 甲寅年

九月十二日

戊寅

上諭內閣曰曾國藩著賞給兵部侍郎銜辦理軍務毋庸署理湖北巡撫陶恩培著補授湖北巡撫未到任以前著楊需兼署雷以誠著賞給三品頂戴補授江蘇布政使仍留揚州軍營幫辦軍務

十三日

己卯

向榮奏言八月二十一日鄧紹良帶

兵行抵太平該逆聞風竄回采石我軍分營扼堵要衝二十四日賊衆由采石前來窺伺經我軍擊退二十五日有賊四五千入復由采石至黃山焚擾我軍分三路兜截誘入伏中左右排槍疊擊該逆潰奔追至采石之四喜橋是日計斃賊四百八十七日分兵直攻采石拆毀賊營二座二十九三十等日該逆連次分股來

撲適傅振邦長桂各軍由秣陵關繞出沿江會
合鄧紹良分路迎勦斬馘多名傅振邦衝入賊
隊手腕被礮打傷仍前督戰逆賊抵敵不住奔
潰回巢現在兩梁山與金柱關各有賊船數百
隻西梁山又有賊營四座時有窺撲太平蕪湖
之意查蕪湖爲上游要口該逆之所必爭該處
雖有浙江甯國兵勇約五千人然皆不甚得力

刻下金陵大兵實難再分現擬將前次調赴徽州川兵一千名折回蕪湖以當前敵而令浙江甯國兵勇助勢庶幾戰守可恃鄧紹良扼紮太平之兵先僅一千二百餘名傅振邦折回金陵就醫所帶兵勇已併歸鄧紹良統帶亦止二千餘人堵剿尙覺不敷惟有俟紅單等船駛上庶可會攻上游之賊無如吳全美葉常春各船尙

寄碇浦口阻風不能上駛復據水營各鎮稟報
二十五日該逆木鐸二座並賊划快船數十隻
由七里洲夾江口衝出經吳全美等擊沈賊划
十數隻賊鐸順流直下一靠金山一泊鮎魚套
臣已知會下游師船迅圖設法攻毀力斷賊援
現聞瓜州攻剿得手賊勢已窮鎮江之賊經余
萬清堵剿亦尙得手臣已分別咨行水陸防剿

並嚴催吳全美葉常春等督飭水勇及調到陳
世忠閩勇爬船趕緊設法斷賊橋練會攻九洲
洲賊營疏通江路俾紅單等船一遇順風立即
上駛會合鄧紹良陸路之兵相機前進直至蕪
湖庶可遏賊來源但使上游一清賊無接濟則
下游次第籌勦較有把握矣奏入

上命軍機大臣傳諭托明阿向榮陳金綬雷以誠曰鄧

紹良傳振邦等連日采石之戰斬獲雖不爲少但察看賊情似非悍賊死黨恐係以小勝驕我兵心而兩梁山及金柱關等處賊船復以大股突撲該大臣旣將傳振邦之兵併歸鄧紹良統帶卽著飭令該員加意嚴扼能進則進使上游對紮各賊營不能安穩久踞方操勝算吳全美葉常春所帶兵船擅自折回本屬可惡該大臣旣稱嚴催該總兵等速破九洑洲賊

營立即上駛著卽嚴催趨提若該總兵等藉詞延宕
既不速攻洲地又不進扼太平或於埽清賊巢之後
又託言協剿瓜州置上游於不顧卽著據實嚴叅連
前此不聽節制之罪一併重懲蕪湖爲上游要口浙
江兵勇旣難得力自應以勁兵協守該大臣所稱檄
調赴徽川兵往蕪湖而令甯國兵勇助勢意在酌量
兵勢強弱爲布置之先後著卽妥籌辦理賊鋒是否

仍泊鎮江南岸抑又駛往下游雷以誠前赴焦山一
帶福建派來之總兵孫雲鴻亦在該處能否相度情
形迅將賊簿設法攻毀並著據實奏聞現在師船不
爲不多洲地賊巢不過兩三處何以不卽進攻瓜州
已屬彈丸洲地尤爲狹小若逆匪每占一處卽牽掣
一路得力之兵何日始能肅清江面況師船全在江
北托明阿等責無旁貸著卽迅速勦除使烏江之賊

退無所踞自不敢上竄滁州等處關山全椒雖皆派
有防兵若水路不斷則陸路終不能防此係南北緊
要關鍵托明阿等豈可玩泄視之耶向榮摺內有現
聞瓜州攻勦得手賊勢已窮之語托明阿等務當迅
速進勦儻一勝之後輒復停兵數日或賊匪出撲始
行督兵抵禦是賊逸我勞雖有勝仗終難攻克況上
游紅單船業已折回現在金陵瓜鎮賊援復通使不

先復瓜州豈非前功盡棄該大臣等萬不准再事耽延任令負嵎死守

同日陳啟邁奏言據署九江鎮總兵羅玉斌咨報九江城內新添賊匪一千餘名復有逆船一百五十餘號由湖北來灣泊龍開河連前船共有二百餘號約計水陸賊匪七千餘人潯中兵力實屬單薄因遊擊景星德安剿匪事竣知會

該遊擊卽帶兵勇前往堵剿八月十四五日九
江營兵川貴勇及景星所帶兵勇陸續前赴蛇
岡嶺一帶擇要駐紮乃營壘尙未築就十五日
夜城內突出賊匪數千分路撲營景星卽督兵
迎剿殺賊多名詎該逆分股繞至我軍之後兩
面夾攻以致兵勇被衝潰散傷亡不少該遊擊
奮力衝突身受多傷登時被害把總高光裕外

委黃貴珍亦同時陣亡羅玉斌聞信馳往策應
路遇潰散兵勇均已退回隨於通遠驛紮營杜
賊內竄又據探報湖口彭澤泊有匪船七八百
號揚言上竄九江約會該處逆黨分水陸兩路
來攻省城等情臣查九江地方爲賊船往來必
由之路該逆勢所必爭盤踞郡城者皆其死黨
且有江面匪船及湖北興國大股爲之聲援是

以臣前擬將武甯股匪勦滅再以全力併攻潯陽旣無內顧之憂並免輕進之失今景星於未接到臣札之先經羅玉斌調往協勦被匪前後攻撲力戰陣亡目下我兵新挫難保該逆不乘隙窺伺德安而湖口等處停泊賊艇亦有赴潯約會分竄之謠卽應嚴密防勦現派臬司惲光宸選帶練勇九百名並於義甯調回已革守備

吳錫光帶領靖勇四百餘名均在建昌會合相
度緩急分投堵禦一俟續到賊舟退去卽馳往
武甯迅將該處匪徒勦洗淨盡再行厚集兵力
圍攻潯郡並飛飭已革總兵趙如勝嚴督水師
實力防守以杜賊船上竄至常州營遊擊儘先
參將景星新喻汎把總高光裕臨江營外委黃
貴珍均著戰功遽遭戕害實深憫惜應請

飭部從優議卹以慰忠魂奏入

上命軍機大臣傳諭陳啟邁曰楚北逆衆旣經上游兵
勇追剿得手則潰敗餘匪紛紛下竄本應及早籌防
九江一郡爲江路咽喉久經該逆盤踞此次復添集
賊船乘虛來犯帶兵員弁多有傷亡湖口彭澤一路
有匪船多隻揚言上竄此時欲保守省垣總以併力
先攻九江扼其來路爲要著鄰省援兵一時難以徵

調曾國藩等水陸兩軍雖可指日東下然亦不能坐
待此軍任令逆燄更肆猖獗該撫現派臬司惲光宸
添帶兵勇並飭吳錫光帶勇在建昌會合務令鼓勇
直前以勦爲堵斷不准逗留建昌致賊艇竄入鄱湖
更難措手仍一面激勵官紳民勇協同防勦以助兵
力之不逮其趙如勝所領水師與其徒令防守不如
出湖迎勦以遏兇鋒至武甯股匪尙未勦除自應妥

籌兼顧若俟彼處賊匪勦除淨盡再圖攻克九江是
否不致遲誤該撫務當通籌全局相機而行毋令有
用之兵徒勞往返所有陣亡之常州營遊擊儘先參
將景星新喻汛把總高光裕臨江營外委黃貴珍均
著交部從優議卹

十六日
壬午湖廣總督兼署湖北巡撫楊需奏言

據署黃州府許廣藻稟報九月初四日督同黃

岡縣翁汝瀛帶領紳團於淋山河團風桃店等處分道勦賊擒斬數百名直抵黃州城下賊匪望風逃竄下船開駛追至江邊擊斃數十名落水淹斃者數十名當將黃州城池收復該逆水陸奔竄分泊大冶蘄州興國一帶江面臣卽飛咨桂明速由新洲前進扼要堵勦武昌縣賊匪聞信驚惶署武昌縣知縣白潤於初五日約會

紳團數百人多張旗幟徑偪縣城西門賊匪不敢抗拒分出南北兩門逃竄追至北門不及下船者多擠撲淹斃擊沈賊船三隻斬十餘人當卽收復城池其漢川沔陽一帶竄匪先後捕斬數百名數十名不等湖澤漸次肅清現在會國藩塔齊布水陸之師均已分起下行臣先飭魁玉楊昌泗等會合桂明一同前往並飛咨江西

安徽撫臣一律堵剿以冀迅速掃除查此次收復省城全賴湖南水陸數大戰挫折賊鋒又礮船得力將賊船大加焚燬賊之輜重喪失糧草無存膽落心離分蹤四竄故能一鼓克復勢如破竹現在武昌省城空無居民衙署民房大半殘毀漢陽府城尤爲殘破計清理街道修葺衙署民房甚需時日伏思武昌漢陽夾江對峙形

勢雄闊必須有水陸重兵扼守善後事宜自以造船鑄礮練兵儲糧爲最要而經費支絀辦理匪易竊謂坐守不如進攻臣是以有以戰爲守作一勞永逸之計南省礮船分則戰守皆形不足合則攻剿實能擅長大江爲楚省咽喉鎖鑰礮船擊於上紅單船擊於下江路不難肅清江路清而接濟斷江甯鎮江之賊必可盡鏟根株

否則金陵之巢穴難除江皖之蔓延日甚楚南
楚北一水相連終無安枕之日聞藩司夏廷樾
業已行抵長沙卽飛催速行赴任臣整頓兵勇
布置防守俟藩臬兩司到省後卽當親督後隊
會同曾國藩等合力下擊奏入

上命軍機大臣傳諭楊需曰現在曾國藩塔齊布水陸
之師已分起東下楊需業飭魁玉楊昌泗等會合同

往並咨江西安徽一律防剿所籌尙合機宜前降旨
給曾國藩兵部侍郎銜辦理軍務毋庸署理撫篆誠
以楚北兵威大振曾國藩卽可與塔齊布同出長江
以次掃蕩九江等處賊艘順流收復安慶各城不能
復拘以職守該督所議以戰爲守自是一勞永逸之
計惟精銳俱出內地空虛夏廷樾已抵長沙卽著飭
赴新任無庸前往四川武漢旣復岳州防務較緩並

可飭令胡林翼速來楚北以資彈壓撫綏曾國藩等
專意東下得楊需後隊之師既可互相策應如楊需
督兵會剿有夏廷樾等駐紮近省要隘亦可後顧無
虞層層布置總宜計出萬全惟漢川應沔一帶湖澤
旣漸肅清襄陽卽非喫緊之地豐伸前此所駐各兵
應移何處截扼楊需務卽咨商王慶雲速飭豐伸擇
要移防以便該督等出境剿賊崇陽縣城復被賊陷

官文曾咨商楊需與塔齊布撥兵往剿此時如何剿辦何以未見奏報該督務當戰守互資內外兼顧所稱省垣殘破善後事宜以造船鑄礮練兵儲糧爲要務自應次第舉行惟此時曾國藩等水陸進剿湖北防堵事宜該督責無旁貸務當擇要駐兵妥籌布置總期沿江痛加勦洗使該逆窺伺之心絕則楚北之民安城垣衙署再次第修葺猶未爲晚曾國藩塔齊

布各營軍餉向來取給於湖南現在相距路遠轉運更難該督須隨時接濟毋令匱乏

上又命軍機大臣傳諭曾國藩塔齊布曰前此搜剿襄河賊匪諭令曾國藩等乘此機會謀定後戰誠以克復沿江諸城在此一舉必當計出萬全斷不可稍有挫衄現在黃州武昌次第收復我兵水陸並進行抵何處及如何布置情形諒曾國藩等必有奏報在途

黃州賊匪水陸奔竄大冶蘄州興國一帶江面賊船聚泊尙多我兵乘勝追剿自必勢如破竹惟黃州而下卽係九江該郡久爲賊踞前據陳啟邁奏官軍進剿失利湖口彭澤一帶探有匪船多隻揚言上竄該撫雖已派臬司惲光宸及趙如勝等水陸防剿其能否克復九江殊難豫定若上游追剿得手難保賊船不竄入鄱湖設再蔓延江省牽綴我師不能順流直

下則勦辦又費周章曾國藩等務當統籌全局一面
迅速進兵潯江一面知會陳啟邁前後夾擊以期一
鼓殲除毋留後患至皖省久遭蹂躪安慶府賊已踞
爲巢穴勢必負隅死守況廬州尙未克復江北一帶
如無爲和含等處江南一帶如池太所屬多爲賊踞
太平蕪湖雖經克復兵力尙單逆匪屯踞東西梁山
及金柱關等處每欲乘閒窺伺徽甯以現在情形而

論向榮派赴太平之兵僅有一千七百餘名南北兩岸兵力究嫌單薄曾國藩前已賞給兵部侍郎銜毋庸署理湖北巡撫旣無地方之責即可專力追勦但必須統籌全局毋令逆匪南北分竄方爲妥善並隨時知照江皖各撫及托明阿向榮等四面兜擊以期直擣金陵固不可遷延觀望坐失事機亦不可銳進貪功致有貽誤曾國藩等必能兼權熟計迅奏膚公

也

上諭內閣曰我軍克復武昌漢陽後水陸各路追剿餘
匪武黃一帶尙爲賊藪經楊需飭令署黃州府知府
許賡藻等帶領紳團分道剿賊斬擒數百名賊匪望
風逃竄遂將黃州府城武昌縣城收復辦理尙爲得
手現在曾國藩等水陸各軍已分起東下著楊需仍
飭所屬文武員弁進剿蘄州興國一帶江面聚泊賊

船務將楚省餘燼全行殄滅卽行進剿下游毋稍延緩

十八日甲申湖南提督塔齊布兵部侍郎銜曾國

藩奏言自武漢克復後襄河以內賊船焚剿殆盡江漢一律肅清急應乘勝進剿查此次敗竄之賊脅從解散分途回籍者約二三萬人逃赴下游回踞舊巢者亦尙有數萬人南岸之解散

者爲數尙少其回巢抗拒者多集於興國州北岸之解散者爲數極衆其回巢抗拒者多集於蘄州廣濟等屬而皆以水次爲老巢以舟楫爲藏身之固屢據探稟北岸之黃州府南岸之武昌縣均已收復自巴河以下經田家鎮道士袱直至九江節節皆有賊船臣等現與兼署督臣楊需商定三路進兵南路由臣塔齊布率湖南

兵勇進兵興國大冶等處北路由署督臣派令
固原提臣桂明等率各營兵勇進攻蘄州廣濟
等處水師由江路直下楊載福彭玉麟等率前
幫先發臣國藩督同李孟羣等率後幫繼進俟
抵黃州時與陸路北軍一會抵田家鎮富池口
時與陸路南軍一會北軍行至廣濟將入皖境
再與署督臣商定行止南軍則須勦辦九江後

乃能渡江而北以圖疾擣安慶規復省會該逆
據掠民船以數萬計經臣等一軍轟擊焚燒者
不及七千各省官軍焚擊者亦不過數千下游
現存賊艇爲數尙復不少九江以下必當大戰
數次臣等惟有激勵士卒步步整頓以期廓清
江面奏入

上命軍機大臣傳諭楊需曾國藩塔齊布曰以長江大

局而論楚北上游旣已漸次肅清則各路官軍乘勝東趨自成破竹之勢楊需前奏坐守不如進攻擬親督後隊會合下擊今曾國藩等定擬南北兩路一由塔齊布進攻興國等處一由楊需派令桂明等進攻蘄州一帶曾國藩水師則由中路直下似此三軍齊發直搗賊巢原屬制勝上策但下游賊船蟻集我兵分道進攻若非首尾相顧聯絡一氣則能分而不能

合殊非兵家所宜所籌於黃州會合北軍於田家鎮
富池口會合南軍雖聲勢不至隔絕但兵機移步換
形賊情亦詭詐百出總須出奇應變步步爲營以免
孤軍深入方操勝算其桂明一軍較之楚南兵勇強
弱是否相當儻彼強此弱南岸被剿緊急該逆必至
伺隙北渡該督等曾否慮及此次東下之師關繫大
局轉機務期成算在胸相機籌辦能制賊而不爲賊

制庶可次第廓清也

二十一日丁亥袁甲三奏言查皖省現在情形處

處喫重廬郡以南民生之塗炭賊勢之猖獗早
在

聖明洞鑒之中現在湖北之賊將盡江甯之賊漸窮上
游師船追趕下游艇船攔截該逆江路往來已
屬不能自由南岸徽甯一帶節節設防疊次獲

勝該逆亦不敢遽行窺伺儻北岸竟無一旅之
師深恐賊匪乘虛竄入必至無可措手此時廬
郡西南東南情形均爲喫緊須 臣親自督辦方
可稍有把握而臨淮爲南北關鍵 臣駐防數月
聲威尙壯周圍數千里漸就安帖實不敢輕離
一步再四思維不得不於萬難分身之中爲兼
籌並及之計現派舉人臧紆青同知李安中帶

勇一千餘名並駐防正陽關之參將劉玉豹帶
兵五百名會合和春等所派道員何桂珍先到
六安相機進剿其全淞一路另派知縣徐曉峯
等會同廬鳳道張光第等共帶兵勇一千七百
餘名由關山至烏衣一帶聯絡駐紮與現駐全
椒之署臬司恩錫防剿兼籌相機辦理臣仍暫
駐臨淮以爲各路策應隨時調度並知會和春

福濟妥商機宜以期迅掃妖氛

袁甲三又奏言此次軍務之壞總由於在事諸臣各守疆域能分而不能合一處有警四處設防究其所謂防者不過倖賊之未至未必果有把握也金陵之賊竄擾北岸統計北岸兵勇不下六七千人分布尙難周密儻萃各處防兵與之決一死戰濟以水師夾攻安有不破賊營之

理現在向榮托明阿等業經飭催會勦儻能一
氣掃蕩固屬大快萬一不能得手則賊營一日
不破防兵卽一日難撤卽幸而賊不旁竄而老
師糜餉亦於大局無補臣亟思親自督兵前往
而非沿江一帶防兵及江面水師均歸節制且
所需糧餉金陵揚州隨時接濟則動多掣肘萬
萬不能成事刻下所尤難者臨淮爲南北衝要

無論士民泣留不能脫然竟去且土匪之觀隙而動逆賊之乘虛而入到處均屬可慮無大員控制萬萬不能放心臣此次分兵兩路前進原期西南路如能得手湖北礮船趕下卽可直抵安慶以扼逆賊之吭東南路如能得手則由和無而上亦可與西南路會合一氣長江之險據爲我有金陵廬州必可不戰自復惟事之成敗

不可知不敢以空言豫瀆

聖聽亦不敢以薄才自肩重任儻蒙

皇上另行簡派大員迅來臨淮接辦一切俾臣得相機

前進並乞

恩命假以事權雖成功未可豫卜而軀命不敢自惜涇
涇愚誠不敢不瀝陳於

君父之前奏入

上命軍機大臣傳諭和春福濟袁甲三曰此時南路攻
剿誠屬緊要而臨淮爲南北鎖鑰關繫尤重袁甲三
督防數月聲威頗壯若遽令其督兵南往另派大員
前往接辦一時殊無得力之員萬一分兵之後匪黨
乘機竊發於北路關鍵大有妨礙旣據袁甲三分派
臧紆青張光第等各領兵勇前往西南東南兩路剿
辦袁甲三卽著仍駐臨淮策應各路現在楚北東下

之師曾國藩與塔齊布桂明定議分三路直擣賊巢
一俟九江肅清卽沿江而下會攻安慶著和春福濟
一面嚴督官軍迅復廬州一面抽撥兵勇相機策應
楚師旣由西而東勢如破竹皖兵卽應自北而南併
力夾擊務須聯絡聲援會合一氣爲掃蕩逆氛之計
其全滁烏江一帶賊營尙多並著該提督等隨時飛
咨托明阿向榮無分南北協力殲除斷不准稍存畛

域失此緊要機會也

二十二日戊子和春福濟奏言廬江自上年冬閒

被賊占踞臣福濟於三月閒卽札飭該縣民人

趕辦團練七月閒密傳貢生吳廷香文生鮑豐

基等來營與臣和春面諭以機有可圖密籌進

取一面探聞該縣之賊由巢湖駛入廬州南鄉

意圖接應隨卽飛飭該紳士等乘其空虛速覓

內綫妥爲布置頃據稟報文生姚克厚接到密
札首先起練攻城鮑豐基暗糾各約於八月三
十日環剿吳廷香亦由舒統帶練勇星馳夾擊
外委熊允升等率隊分攻各門典史韓澍等統
帶練勇在舒桐交界扼要堵截共計練勇三四
千人分番轟擊忽有逆匪多名由無爲州赴廬
接應城內之賊開西南門接仗姚克厚等內應

外合一擁進城砍殺數十人擒獲賊館逆首十七名及僞監軍任大綱等多名熊允升等陸續進城搜斬逆黨三百餘人臣等查賊踞廬江已閱十月之久該約首鮑豐基等竟能糾約鄉民攻其不備不勞兵餉克復城池洵屬效順輸忠深明大義容俟查明出力紳民練勇奏請

恩施以昭激勸惟該縣四面受敵兼之環繞巢湖現在

裕溪口江面賊匪來去自由新復之城籌防不易現令道員何桂珍帶勇五百名馳赴駐紮相機進攻桐城防剿兼施並仍飭鮑豐基等整頓鄉團勿稍鬆懈奏入

上嘉之

二十四日

庚寅

勝保奏言九月二十八等日兩

次督兵進攻見賊之全力俱在東北其缺口處

時刻被礮轟擊賊雖不敢堵禦修築但其缺口
左右城上柵壘重重槍礮火罐甚密我兵前次
上城未能得手卽由於此且賊自城垣轟塌後
守護愈力日夜伏在城外地洞濠溝之中防我
攻撲並於濠內用木板樹枝層層遮護藏身於
中我兵擁至城下輒中其計惟有設法先破濠
內伏賊仍須安用地雷將缺口左右城上柵壘

轟開方可得手現已趕造攔牌百餘面並添辦
挖濠器具剋日分三路進攻查東隅城垣經地
雷轟開數丈爲賊所併力專注之處我兵亦惟
於此處進攻較易爲力此次激勵兵勇力圖克
復日內卽可動手臣等竭力盡心晝夜籌畫祇
以此賊詭計多端攻剿萬分費手不勝慚憤之
至奏入

上命軍機大臣傳諭勝保德勒克色楞善祿崇恩曰據奏兩次進攻該逆拒守益力我兵未能卽時攻克又以添造攜牌各器具稽延時日朕覽奏之餘倍深焦急豈該大臣等身履行閒轉漠然不知愧奮現在攻具造齊已定剋日分三路並攻之舉若仍如前次奏報東北城垣已陷而各門不肯同時並進統帥之罪固無所逃卽德勒克色楞等分任勦賊之責亦豈能

屢從寬假據稱東北垣缺陷數丈該逆併力專注在
此我兵進攻較易亦在此若此路可破自能一擁登
陴然亦須於東南西南正西三門糾約齊備同破賊
巢使逆匪奔救不暇則柵壘雖堅必不能處處抵禦
攻堅攻瑕隨時策應斷無以數百賊黨能爲四面設
防之理前此功敗垂成皆由帶兵大員彼此觀望所
致一誤豈堪再誤朕於該大臣等疊次訓諭已極詳

備論功罰罪惟該大臣等自取何路退縮卽將何路
統兵大員治以應得之罪亟圖克復毋失事機

二十七日癸巳僧格林沁西凌阿奏言近日逆匪

仍前死拒百計誘引堅匿不出十三日臣僧格

林沁督帶官兵直至賊壘木城該逆拌死抗拒
正在進攻之際忽有多匪衝出意在抄圍官軍
分投痛剿斃賊甚多我兵受傷四十餘名十五

日又復進攻該逆負固死守並無一匪出巢祇在壘內施放槍礮密如雨下我兵仍未得手茲據投出之人供稱賊營所做呂公車前推容易拉回極難最怕重濠揆之賊情此時未卽衝撲者諒因防守周帀是以遲疑不敢輕試並訊得該逆已決挖河隄引水東面意欲乘船撲出其情形慌張已可概見二十四日夜逆匪撲向瑞

昌營牆經官兵登時擊退臣惟有會同各路統帶將士設法竭力進攻及早蕩掃以贖愆尤奏
八

上命軍機大臣傳諭僧格林沁西凌阿曰此次接仗雖屬得手但僅僧格林沁一路進攻其各路帶兵大員何以不同時並進殊不可解況我兵受傷者亦復不少究竟如何接仗情形亦未詳細聲敘該逆一經挫

敗卽負嵎死守已成慣技惟在我兵設法誘敵或潛
師襲取四面環攻斷不能因賊不出巢遂至束手無
策該大臣屢次奏稱賊糧缺乏何以數月之久賊勢
尙能固守況賊中槍礮尙多可見該逆米糧火藥並
未斷絕且恐附近愚民暗中接濟似此曠日持久珍
滅無期該大臣統領全軍貽誤之罪又將誰諉據稱
逆匪決挖河隄引水東面欲乘船撲出是該逆已欲

乘閒竄突該大臣等務當剋日進攻一面杜其竄路
毋得再事遷延致干重罪

同日江甯將軍托明阿前直隸提督陳金綬江
蘇布政使雷以誠奏言臣等商同於初四日出
隊分東西兩岸進攻瓜州臣托明阿督同副都
統德興阿等由西岸分三路進剿臣陳金綬臣
雷以誠督同副都統德崇額等由東岸分三路

進剿先後行抵賊營槍礮齊放擊斃賊匪數十
名天晚撤隊是日水師各船因無風不能駛往
夾擊臣等復約會水營並豫咨提督余萬清以
東南風爲期江南圍攻鎮江江北圍攻瓜州同
時水陸並進使賊不能相顧一面飛催陳國泰
孫雲鴻周士法張攀龍等迅剿江內賊箠至十
五日漸轉東風臣等飛咨余萬清一面傳諭東

西各營暨土橋焦山各水營同時並舉十六日
子刻臣托明阿親督西岸馬步官兵分三路進
兵遊擊馬永泰等由三道濠溝搭橋直撲運河
隄岸進至第二道濠溝賊已將浮橋撤去水勢
甚寬不能搭橋徑渡官兵與賊隔濠相持直至
日暮逐漸撤退是日東岸仍前分路進攻虹橋
等處賊營搭板渡河焚燬賊卡殲斃賊匪多名

薄暮撤隊回營伏查是日之戰各營官弁兵勇奮力爭先實屬踴躍用命惟自十五日風色稍轉臣等徧諭各營原冀水師合剿乃十五日傳令之際又聞金陵續有賊箠下駛並聞江上隱有礮聲臣等飛飭沿江嚴防次日會攻瓜州未見江上師船駛至撤隊後接到江浦等處稟報續有賊箠於十四日未刻駛出金陵下關十五

日駛赴下游各該處師船及民勇快船沿江邀擊不能截止祇將護箚大小賊船擊沈數隻斃賊無數賊箚駛近瓜州金山有快船數十隻迎上接應我軍追至土橋賊已護箚而去俄頃已過金山礮臺又據孫雲鴻等稟稱接余萬清函約於十五十七等日派張攀龍等帶領師船進攻賊箚該逆於甘露寺上下開礮我師逼近南

岸奮力轟擊至鎮江大馬頭江神廟地方轟塌
賊營甄城數處擊毀賊船數隻臣等現飭陳國
泰孫雲鴻周士法等趕緊剿毀一面相機協攻
瓜州復飭陳世忠等嚴扼段要口上游毋令賊
簞再來衝突至浦口洲地賊營武慶李德麟等
迄今未能剿除現在吳全美葉常春等所帶紅
單拖罾各船均聚浦口兵力不爲不厚業經咨

會向榮嚴催該鎮等聯絡聲勢協力將洲地賊
營並橫江鐵鎖全數勦洗以清江面如再延玩
卽一律嚴加叅辦再據探報續由下關駛下之
木筏一座在八卦洲江面經艇師各船暨水勇
划船圍繞攻擊已於十九日夜間將賊筏燒燬
殺斃賊匪甚多並奪獲旗幟槍礮無數合併陳
明

同日向榮奏言上方橋西賊營負嵎堅守該逆
每恃通濟門雨花臺各路援應我軍疊次環攻
不下因思該逆併守前營其後雨花臺一帶賊
營或空當派副將張國樑等督帶精兵二千直
擣雨花臺賊巢另派兵勇五隊令署將軍福興
總兵明安泰分投接應均於初八日卯刻出隊
一齊攻撲賊營該逆槍礮頻施仍前不出我軍

卽以後隊分攻堵紮前隊衝過賊營徑向雨花
臺進剿連破賊卡六重斃賊數十乘勢搶上雨
花臺山梁焚其木柵三道該逆倉卒潰亂我軍
奮身躍入立將兩營攻破殲殺不計其數賊衆
狂奔我軍跟蹤縱擊直抵城下該逆抽去釣橋
堵住城闔矢石槍礮並下我軍無路可登四路
搜殺賊人並將買賣街焚燬復由雨花臺一路

撤回各賊營始終不敢出敵是日之戰計斃賊
五百有餘旋聞太平門外又有奸民在彼貿易
該逆每晨出城買物正可乘機襲攻乃於十二
日五鼓派兵二隊一由馬羣繞路往襲一由龍
脖子接應進攻該逆相率出城突見我軍旗幟
旋即退入鳴角開礮我軍兩路撲攻遙見城門
已閉槍礮來回互擊誠恐兵力徒傷乃將賊買

賣街焚燒拏獲奸民就地正法收隊而回查該
逆閉城死守賊壘未平旣須趕緊進攻尤必先
斷接濟現在善橋一帶賊卡雖屢經勇練襲破
時有斬俘而該處近接秣陵關不特接濟可通
亦復時虞窺擾臣現復抽派遊兵五百名遴員
管帶於秣陵關小丹陽鎮太平一帶往來巡剿
使聲勢遙聯鄧紹良一軍亦無孤懸之慮惟陸

路扼勦得力亟盼舟師上駛會籌所有續行分
提陳國泰紅單船十隻已到石埠橋與浦口吳
全美葉常春等船犄角屯泊堵勦經臣疊檄督
催因浦口水勢溜急須俟東北大風方可併力
進擊一面斷賊鐵練浮橋與浦口水陸諸軍會
勦九洑之賊以期早清江面迅掃妖氛再據水
營各鎮將稟稱十四日未刻有賊木簞二座由

下關江口衝出後有大糧船二隻及大小礮艇
十數隻相隨鼓噪而行葉常春與蔡應龍先將
紅單拖罾排爲兩翼堵住賊船槍礮頻施擊沈
大糧船一隻賊船數隻餘船敗回下關其時吳
全美李德麟率同紅單局艇緊跟賊箠轟擊追
至八卦洲下淺灘將其牽繩壓斷賊箠擱淺其
一箠已先行竄下我船趕緊下追並會合石埠

橋段要口高資港各處守口師船節節兜擊將
箚上木城打穿多處擊斃賊匪不少賊箚黑夜
駛下鎮江所有擱淺賊箚一座經紅單拖舂等
船合圍攻擊因該處水溜且淺不能進前十五
十六等日有大賊船二三十隻率領快划四五
十隻自下關衝下救應被師船分投衝蕩立沈
賊划八九隻賊衆鳧岸潰奔維時七里洲有賊

數百前來接應亦被師船大礮轟退計三日之內擊壞大小賊船三十餘隻斃賊不計其數查此次截剿雖能獲勝而賊簞一則已竄下流一則尙在擱淺師船連日圍攻仍以風微未能卽時攻毀該逆以木簞得計難保不陸續下竄臣已疊次嚴飭該鎮將等迅圖焚攻以防賊船接應儻再堵剿不力定卽嚴叅一面飛飭下游各

船務將賊簿一律掃蕩以清江面而斷賊援均
奏八

上命軍機大臣傳諭托明阿向榮陳金綬雷以誠曰金
陵瓜州兩處陸路得勝而水路前次下竄之賊簿尙
未毀滅該逆又從下關江口續行竄出木簿二座雖
經師船追擊而賊簿一座業已駛至鎮江其在八卦
洲擱淺者究竟是否焚燬吳全美等旣未能盡數追

勦葉常春及石埠橋段要口高資港等處守口之船
復不能實力扼截致該逆游行無阻現在下游十分
喫重著卽嚴催孫雲鴻張攀龍等趕緊將木簕極力
勦除若謂師船不能攏近卽束手無策安用此水營
將弁爲耶浦口洲地賊營久未殲除陸路急攻則由
水路奔竄向榮已提紅單船十隻到石埠橋與吳全
美等船犄角屯泊著卽督飭該鎮等設法斷其鐵練

浮橋先清九淤之賊其段要口地面責之陳世忠等
毋令再被竄下鎮江賊箠責之陳國泰孫雲鴻周士
法等剋期攻毀儻再任意玩忽不知愧奮卽著嚴叅
懲辦此係南北關鍵最爲緊要向榮托明阿等務當
分催水軍及早肅清江面瓜州久未攻克雖疊報勝
仗於事何濟該逆每踞一地我兵卽多一路牽掣若
托明阿等不能迅破賊巢向榮亦不能攔截續竄之

賊船則統帥貽誤之罪與各鎮將等朕亦必執法從事諒該大臣等不敢仍前玩泄也